



Concello da Pastoriza (Lugo)

ORDENANZA MUNICIPAL REGULADORA DO USO DAS VÍAS MUNICIPAIS.

EXPOSICIÓN DE MOTIVOS

O municipio de Pastoriza dispón dunha extensa rede de estradas e camiños rurais de gran transcendencia para a súa economía agraria e gandeira na que se ocupa un sector importante da súa poboación.

Nos últimos anos, o Concello ven executando numerosas obras de mellora e conservación das estradas e camiños rurais que serven no so ao interese xeral senón tamén, e de forma primordial, ás explotacións agrícolas ou agropecuarias existentes neste municipio as cales están en permanente modernización e requiren a existencia dunhas estradas e camiños rurais adaptados ás esixencias que as novas maquinarias agrícolas demandan, todo isto sen prexuízo de que ademais o Concello debe garantir que se podan realizar tamén aqueles usos que se estimen compatibles e complementarios co uso principal de vías e sen esquecer a necesidade de harmonizar e compatibilizar os diferentes usos e aproveitamentos do solo non urbanizable cos principios fundamentais que deben rexer a consecución dun desenvolvemento rural sostible, a conservación da natureza e a protección do medio ambiente.

Tales esixencias desbordan en boa medida a capacidade técnica, económica e de xestión da maioría dos municipios, sobre todo tendo en conta que cada vez é menor a colaboración económica das restantes administracións.

Polo iso, co fin contribuír de forma efectiva a garantir do mellor modo posible a conservación dun patrimonio que se ven financiando mediante o esforzo económico de todos, este Concello en exercicio das potestades normativa e sancionadora previstas no artigo 4 da Lei 7/85, de 2 de abril, reguladora de las Bases de Réxime Local, con respecto ás normas sectoriais existentes e de conformidade coas competencias que lle veñen atribuídas no artigo 25.2 d) da referida Lei, así como no artigo 44 e seguintes do Real Decreto 1372/1986, de 13 de xuño polo que se aproba o Regulamento de Bens das Entidades Locais, aproba a presente Ordenanza, coa finalidade de regular o uso adecuado e racional das vías e camiños de titularidade municipal, garantir o carácter de uso público destes bens e o seu respecto polos usuarios, así como a súa adecuada conservación, mediante a adopción das medidas de protección e restauración que fosen necesarias.

A presente Ordenanza recolle pois as disposicións xerais con respecto aos camiños e vías municipais; regula o uso e aproveitamento dos mesmos; establece as disposicións que garantan a súa conservación, protección e defensa, e o réxime de policía; tipifica os feitos, accións ou omisións que poden constituír infracción administrativa; determina a contía das sancións, a obrigatoriedade de indemnizar os danos e prexuízo causados e o deber do infractor de repoñer os bens afectados, ou parte destes, ao seu anterior estado.





Concello da Pastoriza (Lugo)

TÍTULO I. DISPOSICIÓNS XERAIS

Artigo 1. Obxecto e ámbito de aplicación

A presente ordenanza ten por obxecto regular as condicións de uso do conxunto de vías municipais do Concello de A Pastoriza, entendendo como tal todas aquelas vías de titularidade municipal.

Artigo 2. Natureza xurídica

As vías municipais son bens de dominio e uso público, polo que son inalienables e imprescritibles.

Artigo 3. Competencias da administración municipal

É competencia do Concello de A Pastoriza o exercicio das seguintes facultades en relación coas vías municipais:

1. A ordenación e regulación do uso.
2. A protección, conservación e salvagarda da súa correcta utilización.
3. A defensa da súa integridade.
4. O seu deslinde.
5. A desafectación, ampliación e restablecemento.

Artigo 4. Definicións

1. **Vía municipal:** viario de dominio e uso público de titularidade municipal. Pode diferenciarse nos seguintes tipos:
 - a. **Estradas:** as vías municipais de dominio e uso público proxectadas e construídas fundamentalmente para a circulación de vehículos automóbiles.
 - b. **Camiños:** as restantes vías municipais, entre as que se inclúen os camiños de servizo, agrícolas, forestais ou pecuarios.
2. **Explanación:** superficie comprendida entre as dúas liñas lonxitudinais exteriores daquela.
3. **Aresta exterior da explanación:** e, en cada unha das marxes da estrada, a intersección do noiro do desmonte ou do terraplén co terreo natural.
4. **Calzada:** a parte pavimentada da estrada, destinada á circulación de vehículos automóbiles.
5. **Beiravía:** franxa lonxitudinal pavimentada, contigua á calzada, non destinada á circulación de vehículos automóbiles salvo en circunstancias excepcionais.
6. **Elementos funcionais da estrada:** zonas permanentemente afectas á conservación, á explotación do servizo público viario, ou a outros fins auxiliares ou complementarios, tales como as zonas de estacionamento, paradas de autobuses, áreas de servizo, etc., así como os espazos lonxitudinais,





Concello da Pastoriza (Lugo)


sensiblemente paralelos á estradas, tales como as vías de servizo, as beirarrúas, as sendas peonís e os carrís para a circulación de bicicletas.

Artigo 5. Zonificación das vías municipais

1. **Zona de Dominio Público:** é a zona da vía de titularidade pública adquirida por título lexítimo e integrada pola calzada, os terreos ocupados polos elementos funcionais da estrada e as zonas de dominio público adxacentes.

Enténdese como zona de dominio público adxacente á parte da zona de dominio público non ocupada directamente pola explanación da estrada ou da dos seus elementos funcionais. O límite exterior da zona de dominio público adxacente non poderá ser superior a 10 metros, medidos horizontal e ortogonalmente dente a aresta exterior da explanación correspondente á calzada e elementos funcionais previstos.

2. **Zona de protección:** é a zona situada a ambos lados da zona de dominio público, que comprende as zonas de servidume e de afección:
 - a. **Zona de servidume:** está formada por dúas franxas de terreo, unha a cada beira da estrada, delimitadas interiormente polas liñas exteriores da zona de dominio público e exteriormente por dúas liñas paralelas aos devanditos límites e medidas horizontal e ortogonalmente a eles, a unha distancia de dous metros.
 - b. **Zona de afección:** está formada por dúas franxa de terreo, unha a cada beira da estrada, delimitadas interiormente polas liñas exteriores da zona de servidume e exteriormente por dúas liñas paralelas ás arestas exteriores da explanación e medidas horizontal e ortogonalmente desde elas a unha distancia de trinta metros.



TÍTULO II. USO E APROVEITAMENTO DAS VÍAS

Artigo 6. Uso xeral



CONCELLO DA PASTORIZA (LUGO)



Plaza de Galicia, n.º 1 - C.P. 27287 A Pastoriza (Lugo)
Telf. 982 33 21 97 - Fax 982 33 22 33



<http://apastoriza.sedelectronica.gal>
<http://www.concelloapastoriza.es>



Concello da Pastoriza (Lugo)

Tódalas vías municipais son bens do dominio e uso público, polo que tódolos cidadáns, así como os animais e os vehículos, teñen dereito a transitar por elas, de acordo ca súa natureza e o seu uso e conforme ás limitacións establecidas na presente ordenanza.

Artigo 7. Outros usos e aproveitamentos

1. Nas vías municipais permitiranse as actividades directamente relacionadas coa conservación, recuperación e mantemento das mesmas, así como aqueles usos e aproveitamentos que o Concello considere de utilidade pública ou interese xeral.
2. A realización doutros usos ou aproveitamentos só será posible sempre que resulte necesaria a súa localización na vía, sexan compatibles coa circulación e non limite a seguridade ou comodidade da mesma.
3. Así mesmo, o Concello poderá permitir, por razóns particulares e de forma motivada, ocupacións temporais das vías cando resulten imprescindibles para a realización de traballos, obras ou servizos que non permitan outra solución alternativa.
4. En calquera caso será precisa a previa autorización por parte do Concello.

Artigo 8. Limitacións de uso

1. Na zona de **dominio público**
 - a. Queda prohibido o impedimento do libre tránsito das persoas, animais e vehículos, así como o peche dos viarios públicos.
 - b. Queda prohibido o tránsito de vehículos de cadeas.
 - c. En función da vía e da situación que o requira para a protección do firme e a seguridade dos viandantes, o tránsito de vehículos pesados poderá ser regulado polo Concello, establecéndose a prohibición de circular en función da súa tonelaxe, exceptuando o tránsito por necesidades de auxilio.
 - d. Queda prohibido producir danos nos elementos integrantes do dominio público.
 - e. Queda prohibida a realización de traballos agrícolas na zona de dominio público que puideran afectar ás estruturas que conforman a vía. O límite de aradura debe ser, por tanto, o límite do talud ou do terraplén, realizando sempre o traballo dentro da parcela, quedando prohibidos os xiros da maquinaria, o arrastre de apeiros o calquera outra actividade que dane a vía.
 - f. Queda prohibida a modificación, alteración ou realización de obras que non estean autorizadas polo Concello tales como a instalación de redes de abastecemento, saneamento, rego, alumeado ou similares que afecten ó dominio público.
 - g. Prohíbese obstaculizar os cursos naturais das augas.
 - h. Queda prohibida a modificación, obstrución e/ou eliminación das cunetas.
 - i. Os propietarios das fincas limítrofes coas vías públicas deberán manter en estado óptimo de uso as cunetas e restituílas a este estado, no caso de





Concello da Pastoriza (Lugo)

producirse a súa colmatación. Os labores de conservación das mesmas por parte do Concello non eximen aos propietarios do cumprimento de esta obriga.

- j. Co fin de diminuír o dano e mellorar a conservación das vías públicas, o Concello resérvase o dereito de realizar novas cunetas, taxeas ou sumidoiros que permitan una axeitada distribución das augas.
- k. Poderán realizarse salvacunetas para acceso ás distintas fincas sempre que os canos presenten un diámetro mínimo de 300 mm e un largo máximo de 10 m en cemento e presenten unha pendente axeitada de forma que as augas de escorrenta das fincas non invadan a plataforma do viario. Os gastos de construción correrán a cargo dos correspondentes usuarios. Garantírase a funcionalidade e o mantemento das mesmas.
- l. O Concello poderá limitar o acceso ás parcelas dende as vías, establecer unha localización idónea por razóns técnicas ou reordenar os accesos existentes para mellorar a súa xestión.
- m. Queda prohibido o depósito de materiais, así como arroxar obxectos, vertidos, residuos ou escombros de calquera tipo.
- n. A terra procedente de fincas particulares que invada o dominio público deberá ser restituída á súa finca de orixe polo propietario.
- ñ. Os propietarios dos predios limítrofes coa vía pública deberán realizar as correspondentes tarefas de roza, evitando que a vexetación invada a zona de dominio público. Deberán eliminar aquelas partes das árbores que, aínda estando situadas dentro da súa propiedade, invadan o dominio público ata unha altura de 5 metros, así como aquelas árbores con raíces que se estendan dentro desta zona. O Concello poderá esixir a eliminación total naqueles casos nos que se produzan danos manifestos no dominio público.
- o. Prohíbese obstaculizar o viario co arborado das fincas limítrofes e deberá ser retirado de forma inmediata por parte dos propietarios dos predios limítrofes.
- p. Segundo o artigo 20 bis a da Lei 3/2.007, do 9 de abril, de prevención e defensa contra os incendios forestais de Galicia, na zona de dominio público non poderá haber as seguintes especies vexetais:
 - Pinus pinaster. Pino do país
 - Pinus sylvestris. Pino silvestre
 - Pinus radiata. Pino insigne
 - Pseudotsuga menziesii. Pino Oregón
 - Acacia dealbata. Mimosa
 - Acacia melanoxylum. Acacia negra
 - Eucalyptus spp. Eucalipto
 - Calluna vulgaris. Queiruga
 - Chamaespartium tridentatum. Carqueixa





Concello da Pastoriza (Lugo)

- Cytisus spp. Xesta
 - Erica spp. Breixo
 - Genista spp. Piorno
 - Pteridium aquilinum. Fento
 - Rubus spp. Silva
 - Ulex europeus. Toxo
- q. Queda prohibida a queima de calquera tipo de residuo.
- r. Queda prohibido o estacionamento, fóra das zonas habilitadas para tal efecto, de calquera clase de vehículo ou remolque que obstaculice o paso, agás que non exista outra posibilidade e polo tempo mínimo imprescindible.
- s. Queda prohibido lavar vehículos e maquinaria, a realización de cambios de aceite ou outros líquidos, así como a reparación dos mesmos, salvo actuacións puntuais de emerxencia. En todo caso, deberase proceder á posterior limpeza da zona afectada.
- t. Os usuarios das vías deberán respectar os límites de velocidade establecidos en cada vía en función da normativa sectorial.
2. **Na zona de protección**
- a. Os propietarios das parcelas contiguas á zona de dominio público deberán conservar o estado das mesmas en condicións de seguridade e salubridade, realizando as obras necesarias coa finalidade de evitar danos sobre as vías.
- En todo caso, os propietarios deberán manter as terrazas de retención e as ribadas existentes en bo estado de conservación, evitando os derrubamentos e moi especialmente a aparición de cárcavas.
- b. As construcións e cerramentos que se constrúan con obra de fábrica, vexetación ornamental ou outros elementos permanentes deberán respectar as distancias definidas no planeamento vixente e, en todo caso, a maior das distancias sinaladas a continuación:
- o 4 metros de largo medidos dende o eixe da vía pública.
 - o 2 metros de largo medidos dende a aresta exterior da explanación.
- Exclúense das distancias anteriores a colocación de marcos e cerramentos de postes e arame destinados a delimitar a propiedade rústica.
- c. Non se poderán plantar novos exemplares de especies arbóreas e arbustivas dentro das seguintes franxas dende o límite do dominio público:
- o Camiños: 4 metros de largo.
 - o Estradas: 4 metros de largo para as especies frondosas definidas no Anexo I da Lei 7/2.012, do 28 de xuño, de montes de Galicia, e 10 metros de largo para o resto de especies.





Concello da Pastoriza (Lugo)

TÍTULO III. INFRACCIÓNS E SANCIONES

Artigo 9. Infraccións

1. Son infraccións as accións ou omisións que incumbran o establecido na presente ordenanza.
2. Toda infracción implicará a imposición por parte do Concello de sancións aos responsables das mesmas. Ditas sancións non eximen do establecemento doutros procedementos sancionadores por parte da aplicación doutras normativas.
3. Con independencia das sancións que poidan impoñerse o infractor estará obrigado á restitución do ben ao seu estado orixinal, coa indemnización dos danos irreparables e os prexuízos causados.

CAPÍTULO I. ZONA DE DOMINIO PÚBLICO

Artigo 10. Tipificación das infraccións

1. Son infraccións **moi graves**:
 - a. O impedimento do libre tránsito das persoas, animais e vehículos, así como o peche dos viarios públicos.
 - b. A circulación de vehículos de cadeas.
 - c. Producir danos nos elementos integrantes do dominio público.
 - d. A queima de calquera tipo de residuo no dominio público.
 - e. A modificación e/ou eliminación das cunetas.
 - f. A falta de mantemento ou obstrución das cunetas/salvacunetas.
 - g. A realización dos salvacunetas incumprindo as condicións establecidas na presente ordenanza.
 - h. Obstaculizar os cursos naturais das augas.
 - i. A realización de traballos agrícolas que puideran afectar ás estruturas que conforman a vía.
 - j. A non restitución á súa finca de orixe das terras que invadan o dominio público.
 - k. Non eliminar aquelas árbores que invadan o dominio público.
2. Son infraccións **graves**:
 - a. O incumprimento da prohibición de circular en función da tonelaxe, cando así o estableza o Concello.
 - b. A modificación, alteración ou realización de obras que non estean expresamente autorizadas polo Concello.
 - c. O depósito de materiais, así como arroxar obxectos, vertidos, residuos ou escombros de calquera tipo.
 - d. O incumprimento das tarefas de roza ou poda.
3. Son infraccións **leves**:
 - a. Realización de tarefas de mantemento, reparación e limpeza de vehículos e maquinaria.





Concello da Pastoriza (Lugo)

- b. Non proceder á limpeza da zona afectada do dominio público.
- c. Estacionar, fóra das zonas habilitadas para tal efecto, calquera clase de vehículo ou remolque que obstaculice o paso, agás que non exista outra posibilidade e polo tempo mínimo imprescindible.
- d. Non respectar os límites de velocidade establecidos en cada vía.
- e. Calquera outra non contemplada nos puntos anteriores.

Artigo 11. Notificación das infraccións

1. Unha vez que o Concello teña coñecemento da comisión dunha infracción das anteriormente descritas, pasará á notificar a mesma ao infractor. Na notificación indícarase a obriga, no prazo outorgado polo concello dependendo da natureza da infracción sen que se poida superar o prazo de 15 días contados a partir do día seguinte á data de recepción da mesma, do cumprimento do establecido nesta ordenanza, así como, de ser o caso, da restitución do ben ao seu estado orixinal.
2. No caso de incumprimento e/ou non restitución no citado prazo, darase inicio ó procedemento sancionador.
3. Así mesmo, no caso de incumprimento e/ou non restitución no prazo máximo de 1 mes dende o día seguinte á data de recepción da notificación, paralelamente ó expediente sancionador, o Concello poderá proceder á execución da mesma de maneira subsidiaria e con cargo ao infractor, sen prexuízo de que con carácter de urxencia o concello poida actuar nun prazo inferior.

Artigo 12. Procedemento sancionador

- Corresponde aos servizos municipais o exercicio da función inspectora tendente a garantir o cumprimento do disposto nesta ordenanza así como o exercicio da potestade sancionadora recoñecida aos municipios no artigo 4 da Lei 7/1.985, do 2 de abril, reguladora das Bases do réxime Local e do artigo 44 apartado 2 do Regulamento de Bens das Entidades Locais, aprobado polo RD 1.372/1.986, do 13 de xuño.

- O procedemento sancionador será o establecido nesta ordenanza e no non previsto nela aplicarase o disposto no Regulamento de Bens das Entidades Locais, aprobado polo RD 1.372/1.986, do 13 de xuño, e supletoriamente nas disposicións da Lei 33/2003, do 03 de novembro, do patrimonio das Administracións Públicas e da Lei 39/2015 de 1 de outubro, do Procedemento Administrativo Común das Administracións Públicas

Artigo 13. Contía das sancións

1. A contía das sancións será a seguinte:
 - a. Infraccións leves: multa de ata 750 €.
 - b. Infraccións graves: multa de ata 1.500 €.
 - c. Infraccións moi graves: multa de ata 3.000 €.
2. Para graduar a contía da multa atenderase ó importe dos danos causados, ó





Concello da Pastoriza (Lugo)

valor dos bens ou dereitos afectados, a reiteración por parte do responsable e ao grao de culpabilidade deste.

Artigo 14. Persoas responsables

1. A efectos desta ordenanza serán persoas responsables das infraccións as persoas físicas ou xurídicas publicas ou privadas que incorran nas mesmas.
2. En caso de que o autor da infracción non sexa sorprendido cometendo a mesma, pero existan indicios e probadas razóns para determinar que o dano foi causado por labores efectuados nunha determinada finca o suxeito responsable será o propietario ou arrendatario coñecido da parcela.
3. As persoas xurídicas serán sancionadas polas infraccións cometidas polo órgano ou axentes e asumirán o custe das medidas de reparación necesarias sen prexuízo das indemnizacións por danos e prexuízos a terceiros.
4. Cando exista unha pluralidade de suxeitos responsables e non sexa posible determinar o grao de participación a responsabilidade será solidaria.

Artigo 15. Competencia sancionadora

1. Será competente para incoar expediente sancionador por infraccións ás disposicións desta ordenanza, o alcalde, de oficio, a iniciativa propia ou por denuncia dos particulares.
2. A competencia para a imposicións de sancións corresponderá ó señor alcalde.

CAPÍTULO II. ZONA DE PROTECCIÓN

Artigo 16. Infraccións e sancións na zona de protección

O réxime de infraccións e sancións na zona de protección das vías municipais estarase ó disposto en cada normativa sectorial.

DISPOSICIÓN FINAL

A presente ordenanza entrará en vigor ó día seguinte á súa publicación no Boletín Oficial da Provincia de Lugo.

A Pastoriza, 10 de Marzo de 2017

P.D

(Resolución de Alcaldía de 15 de xuño de 2015)

A tenente alcalde

Asdo.: Elva Carrera González





Concello da Pastoriza (Lugo)

Documento asinado electrónicamente á marxe (artigo 26 da Lei 39/2015, de 1 de outubro, do Procedemento Administrativo Común das Administracións Públicas.)

